

KOLOSI

Pepa Paulo ingere panzi kalo-tawana tamâta simo Kolosi lawea

Paulo imo luma sakamao ilo nana ne wurâta nana itula pâri ara kê, ande ingere ngua njine ilâ panzi kalo-tawana tamâta simo Kolosi lawea lâ Esia tâno. Paulo munja imo Kolosi lawea tia, andeta ilonjo ngua tu ilo-kalo soki-soki nde iyaula kinzi kalo-tawana tamâta ilonzi kalonzi. Pananâna tamâta lanjeja pinde sipanananzi tu Kirisi nde Maro Kindeni Natu tia, kala imo rege-rege kunzi anjelo nâ. Aku situla tukuja kaa kaa pinde panzi tona. Andeta lâ pepa njine Paulo ileleanzi iporo kaika tu Yesu nde rege-rege kuku Maro Kindeni tamwata, kala i ne kaika nde njalae njinde. Aku itula vetâna arara pinde panzi tona nana ma sipaveta kuku.

Kinzi tamâta lâ Kolosi lawea kalonzi tawana Yesu mao nâ

¹ Naja Paulo, naja amo Yesu Kirisi ne pâri-tamâta ikura Maro Kindeni tamwata ne pateâna mine. Naja amo taitu kuku ninda-nambwe Timoti,

² kala angere ngua lâ pepa njine tini imâ pa miki Maro Kindeni ne ngu kamo Kolosi lawea, miki njinde kapaipa kuku Yesu Kirisi lâ kala kalomi tawana i mao nâ. Kinda Tamânda Maro Kindeni ne wisi-wisi wa wisi-pisi wa imo kumi.

³ Lâ zo ndia maka kakai noŋa pa nenda Maro Yesu Kirisi Tama Maro Kindeni, ande maka uru kaloma ŋgere ŋana miki kâ, aku lâ zo ŋinde rârâni maka kawama ndaŋge ilâ papa i.

⁴ Ŋana tu maka kaloŋo miki parinami tu nemi kalo-tawana ikeno kaika ndo pa Yesu Kirisi, aku miki uru tinimi mwasa ndo panzi Maro Kindeni ne tamâta rârâni.

⁵ Muŋga, lâ zo ŋinde pâri ara ne ŋgua mao ipâŋga wasaseki pami, ande miki kaloŋo ŋgua ŋana vetâŋa arara ŋinde ma muli imâ ipâŋga pami. Maro Kindeni uru ikatona vetâŋa arara ŋinde pami lâ samba lawea. Kala ŋine miki uru kao tinimi nâ ŋana vetâŋa arara ŋinde kâ, aku ŋine igagati ilomi kalomi ŋana kalomi tawana Yesu Kirisi ku kao ilomi ndo ilâ panzi Maro Kindeni ne tamâta.

⁶ Nanayoni, miki kaloŋo pâri ara ŋana Maro Kindeni ne wisi-wisi kâ, kala kasama wisi-wisi ŋinde kilala sondo lâ. Lâ zo muŋgâŋa ŋinde, aku imâ lee ipâŋga lâ zo ŋine, ande pâri ara ŋinde uru ipula kanaŋo ara ndo lâ ilomi kalomi. Aku pâri ara ndainani nâ isala nia ikura tâno pinde kala ipula kanaŋo ipâŋga mine nâ lâ tamâta rârâ ilonzi kalonzi tona.

⁷ Epafras muŋga itula pâri ara ŋinde pami, kala miki kasama lâ. Epafras nde Kirisi ne wurâta tamâta itogo maka mine, aku maka tinima mwasa ndo papa i. I uru ikai maka niama ŋana ivila miki sondo kâ.

⁸ Itapâri pama tu Koroani Sapâŋa igagatimi ŋana kao ilomi ndo ilâ panzi Maro Kindeni ne tamâta.

Paulo ikai noŋa pa Maro Kindeni tu i ma ipu tini kaika panzi kalo-tawana tamâta simo Kolosi lawea

⁹ Mine kala muŋga, lâ zo ŋinde maka kaloŋo miki parinami mine, aku imâ lee ipâŋga lâ zo ŋine, ande ikura zo zo maka kakai noŋa pa Maro Kindeni tu ma isukami ku io Koroani Sapâŋa imâ pami tu ipananami sondo ŋana vetâŋa ndia Maro Kindeni ilo papa ŋinde, ŋana miki ma kakai ilo-kalo ku kasama ŋinde sondo.

¹⁰ Maka nema noŋa ŋinde nde duvi mine; maka iloma tu miki ma kamo sondo, ikura Maro Ŋalae ipatea pami mine. Ambo miki ma kamo mine, ande i ma ilo ara ŋana nemi vetâŋa rârâni kâ. Maka iloma tu miki ma kaveta vetâŋa arara kie-kie, itogo kâi ipula kanaŋo mine. Aku iloma tu nemi ilo-kalo ma ipâŋga ŋalae, ŋana miki ma kasama Maro Kindeni kilala sondo kâ.

¹¹ Maka kano pa Maro Ŋalae tu i tamwata ne walo ara ŋalae tina ŋinde ma ipu tini kaika pa ilomi kalomi, ŋana miki ma kamandi kaika ku kakale malia rârâni tava ndekâŋa nâ.

¹² Maka iloma tu miki ma kawami ndaŋge pa kinda Tamânda. Ina kala muŋga ive-tami kapâŋga tamâta ara, kala miki kakura tu kalenŋe vetâŋa arara rârâni i muŋga ipatea tu ma iveta panzi ne tamâta, kinzi ŋinde i uru ikai maro panzi kala simo lâ i ne sinâla ŋalae ilo.

¹³ Ŋana tu muŋga, kondoma ne walo ikai kinda kaika lâ. Andeta Maro Kindeni itikia kinda piti lâ, aku io kinda tamo kuku ŋgu ŋinde i Natu uru ikai maro papa. Maro Kindeni ilo ndo keno papa i Natu ŋinde.

¹⁴ Maro Kindeni Natuni ndaina iko kinda piti lâ kondoma ilo, aku izavaru nenda kiesaka rârâni piti marumbu lâ.

Paulo itula Kirisi kilala pwataki

¹⁵ Kinda takura tu tamora Maro Kindeni nao lâ matânda, ande tia. Taitu i Natu itula Maro Kindeni kilala pwataki pa kinda tamora lâ. I Natu ñinde ikai maro pa kelekele rârâni ñinde Maro Kindeni muᅅga ipulianzi sipâᅅga.

¹⁶ Nia ndoyo Maro Kindeni ipatea tu i Natu ñinde ma ipulianzi kelekele rârâni lâ samba ilo wa tâno kulu wa. Ipulianzi kelekele rârâni kinda tamora lâ matânda wa kelekele rârâni takura tu tamora tia wa. Ipulianzi koroani kaika kie-kie ñinde uru simo sikai poe pa kelekele kie-kie. I tamwata muᅅgani ipulianzi kelekele rârâni, aku kelekele rârâni ñinde simo ᅅana sipanea i nâ.

¹⁷ Nia ndoyo, lâ zo ñinde kelekele rârâni ᅅandai sipâᅅga ᅅga, ande Kirisi imo muᅅgani lâ. Aku kelekele rârâni ñinde uru simo nianzi nianzi sondo lâ i kalo nâ.

¹⁸ I tamwata nde imo kulu-kâmba panzi kalotawana tamâta ᅅgu ᅅgu, aku ᅅgu ñinde nde simo sitogo i kie-mbalau mwasina. Kinzi kalotawana tamâta ᅅgu nenzi via duvi kala i. I tamwata imuᅅga panzi tamâta rârâni ᅅana imandi lâ materᅅa nianzi imo via kilo. Mine kala i tamwata imo kulu-kâmba pa kelekele rârâni.

¹⁹ Maro Kindeni ipatea tu i tamwata ne via tava ne ilo-kalo wa kilala ndoni ma ipipi lâ Natu ñinde ilo. Mine kala Maro Kindeni tamwata imo ndo kuku i.

²⁰ Aku Maro Kindeni ipatea tu ma ikai kelekele rârâni lâ samba ilo wa tâno kulu wa, aku ma ikainzi simâ simo taitu kuku i tamwata kilo. Mine kala io Yesu Kirisi ilâ pa kâi popole imâte ku ipaliŋi see maliŋi ndue. Maro Kindeni ne vetâŋa ŋinde iveta kelekele rârâni simo taitu kuku i kilo.

²¹ Muŋga miki kapu mulimi ndo pa Maro Kindeni. Miki nemi ilo-kalo nde ikai kazâŋa papa i. Mine kala kiesaka nde ipipi ndo lâ ilomi kalomi, kala kaveta vetâŋa sakamao kie-kie.

²² Andeta Kirisi ŋga imâte lâ kâi popole tini lâ, aku ŋana i ne vetâŋa ara ŋinde kâ, ande Maro Kindeni ivetami kamo ilomi kalomi taitu kuku i marumbu lâ. I ne vetâŋa ŋinde nde duvi mine; i ilo tu igona miki kamâ papa i tava ilomi mbâra-mbâra ndo, nemi soki tonje tia. Ambo miki ma kamo mine, ande tamâta tonje ma ikura tu isowe ŋgua lâ tinimi ŋana nemi vetâŋa kâ, ande ma tia.

²³ Mine nde ara ŋana miki ma kasaŋa nemi kalo-tawana ndindi nâ ku kamandi kaika. Tia ma vetâŋa tonje imâ itogomi, aku ma kapile nemi mâsi ŋana kao tinimi pa Maro Kindeni tu ma iveta vetâŋa arara pami. Pâri ara nde itula vetâŋa arara ŋinde pwataki pa miki kaloŋo lâ. Naŋa Paulo, naŋani amo wurâta tamâta ŋana pâri ara ŋinde kâ, aku maka tamâta pinde uru katula pâri ara ndainani nâ panzi tamâta rârâni simo tâno kulu.

Paulo uru ivilanzi Kolosi ŋgu

²⁴ Kala ŋine naŋa andeka nâ ŋana nâna ŋinde muŋga akai ŋana avila miki kâ. Kinda nde

tamâta ñana takai nâna mine kâ, aku nâna ñinde ñandai marumbu ñga. Kala ñine naña akai nâna lâ warakâñgu karaenju tini, itogo Kirisi muñga ikai nâna ñana ivilanzi kalotawana tamâta, kinzi ñinde simo sitogo i kiembalau mine. Aku nâna ma ikeno mine lee, ikura lâ zo ndia nâna mine ma marumbu ndo lâ.

²⁵ Maro Kindeni tamwata muñgani ipatea naña tu ma amo i ne ñgu nenzi wurâta tamâta ñana avila miki kâ. Aku ipatea wurâta pana tu ma aporo atula i kawa ñgua ndoni.

²⁶ Muñgani, lâ nia ndoyo, aku imâ lee ipâñga lâ zo ñine, ande Maro Kindeni kawa ñgua ñinde ikeno paveâña nâ, kala tamâta rârâni nde sizizâla ndo ñana. Añga lâ zo ñine ñgua ñinde ipâñga nia yo panzi Maro Kindeni ne tamâta.

²⁷ Maro Kindeni muñgani ipatea tu ma itula ñgua paveâña ñinde ipâñga nia yo pa i ne tamâta kindâ. I kawa ñgua ñinde nde ara ku ara ndo, aku ñgua ñinde nde ñana ivilanzi tamâta ñgu rârâni simo tâno ndoni. Ñgua paveâña ñinde nde mine; Kirisi imo miki ilomi. Mine kala miki uru kao tinimi ñana zo muli ñinde miki ma kamo ara ndo kuku i lâ samba lawea.

²⁸ Mine nde maka uru katula Kirisi parina panzi tamâta rârâni taitu-taitu. Maka iloma tu tamâta rârâni ma sipaipa ndo kuku Kirisi, aku iloma tu nenzi ilo-kalo ma ipâñga ñalae ndo. Mine kala maka uru kaporo ñgua kaika panzi kapanananzi sondo.

²⁹ Naña uru amandi kaika ku amakâsa ñalae tina ñana aveta wurâta ñinde kâ. Kirisi walo

kaika ilua naŋa ŋana aveta mine, aku i ne walo ŋinde uru ipâŋga nia yo lâ nanenŋu wurâta tini.

2

Kinda ma kalonda tawana kaika ku tapu mulinda pa kinzi laŋeŋa tamwatanzi nenzi ŋgua

¹ Naŋa ilonŋu tu miki ma kasama mine; naŋa uru amakâsa ŋalae ŋinde ŋana avila miki kâ. Aku naŋa uru amakâsa mine nâ ŋana avilanzi kalo-tawana tamâta simo Laodisia lawea tona, sitavanzi tamâta pinde naŋa ŋandai ataŋo mbaunzi ŋga.

² Nanenŋu wurâta ŋine nde duvi mine; naŋa ilonŋu tu apu tini kaika pa miki rârâni ilomi kalomi, aku ilonŋu tu apanomi ŋana kamo ilomi kalomi taitu ku kao ilomi ndo ilâ panzi Maro Kindeni ne tamâta rârâni. Ambo miki ma kamo mine, ande nemi ilo-kalo ma ipâŋga sondo, aku ŋinde ma ara ndo. Ninenŋa miki ma kasama Maro Kindeni ne ŋgua paveâŋa ŋinde duvi sondo. Kirisi tamwata nde ŋgua paveâŋa ŋinde kanaŋo.

³ Maro Kindeni ne ilo-kalo kie-kie rârâni nde itogo kelekele ara ndo, ne kulu ŋalae tina. Aku Kirisi simbo nâ ikatona ilo-kalo ndoni ŋinde ikeno i tamwata ilo.

⁴ Naŋa tiningu pwâka tu tamâta tonŋe ma imâ iporo ŋgua mona-mona pa miki ŋana ilaŋemi kâ. Mine kala aporo ŋgua kaŋa mine pami lâ.

⁵ Lâ zo ŋine naŋa amo kumi tia, taitu naŋa uru kalonŋu ŋgere ŋanami ikura zo zo, aku ŋinde itogo naŋa warakâŋgu amo kumi. Aku naŋa andeka nâ, ŋana tu miki kamo ilomi kalomi taitu

ku kamandi kaika, aku nemi kalo-tawana ikeno sondo ndo pa Kirisi.

Kinda ma tapasipa lâ taitu kuku Kirisi ku takai via mao

⁶ Miki kalomi tawana tu Yesu Kirisi nde Maro Njalae. Mine nde ara nana miki ma kapasipa lâ taitu kuku i nâ, itogo kala nîne miki kamo mine.

⁷ Miki ma kapaipa kuku i, itogo kâi io mburu-mburu indue ilâ tâno ilo. Aku miki ma kasâu pa Yesu Kirisi tu isukami, itogo sâmbwe isuka luma kâki mine. Ara nana nemi kalo-tawana ma ipânnga kaika ndo, itogo muŋga sipananami mine. Aku ara nana miki ma kaporo ndanġe njalae ilâ pa Maro Kindeni nâ ikura zo zo.

⁸ Miki kapakatona sondo nġa. Tia ma tamâta tonġe itula tâno tamâta nenzi ilo-kalo lanġa kaŋa-kaŋa pami, aku nġua kaa nġinde ma isae ilomi kalomi ne nzâla giri lâ. Ilo-kalo kie mine nandai iyoka pa Kirisi imâ pa kinda nġa. Kinzi tamâta sikai ilo-kalo kaa mine lâ timbunzi wa tâno nîne ne nġua kaa kaa wa.

⁹ Miki kasama tu Kirisi nde ipânnga tamâta itogo kinda mine, andeta Maro Kindeni ne via wa kilala ndoni nde imo ndo kuku i.

¹⁰ Kirisi nde imo kulu-kâmba panzi koroani kaika rârâni, kinzi nġinde uru sikai poe pa kekeke kie-kie. Miki kapaipa kuku Kirisi lâ. Mine kala Maro Kindeni via mao ilami marumbu lâ, aku via nġinde nde ipipi ndo lâ ilomi.

¹¹ Miki kapaipa kuku i lâ, aku nġinde itogo miki kakai karae-venġa ne mâsi tonġe. Taitu mâsi nġinde nandai irerege kuku tamâta nenzi mâsi nana sive karaenzi kâ. Kirisi iveta mâsi nġinde

ipânga kanaŋo lâ ilomi kalomi. Muŋga, lâ zo ŋinde miki kapaveta kuku mâsi mao ŋinde, ande Kirisi iyautemi piti lâ ilo-kalo siŋga ne vetâŋa potomule.

¹² Muŋga Maro Kindeni ne walo kaika ipaŋo Kirisi lâ mateŋa nianzi imo via kilo. Aku miki kapaipa kuku Kirisi lâ. Mine kala lâ zo ŋinde miki kalili pâri ara ne lââ, ande ŋinde itogo Maro Kindeni ikea miki lâ kuru ilo kuku Kirisi, ŋineŋga ipaŋomi kamo viami kilo kuku i.

¹³ Muŋga miki kaveta kiesaka kie-kie, aku kaponu muli pa ilo-kalo siŋga nâ. Lâ zo ŋinde, miki kamo katogonzi mateŋa tamâta mine, aku miki kamo piti ndo ŋana Maro Kindeni ne ŋgua pâŋa kê. Andeta kala ŋine Maro Kindeni via mao ilua kinda lâ, itogo via ŋinde muŋga ilua Kirisi mine, aku izavaru nenda kiesaka rârâni piti lâ tininda.

¹⁴ Nanayoni Mose ne ŋgua tukuŋa itula nenda vetâŋa soki rârâni ipânga nia yo, aku tukuŋa ŋinde ikai kazâŋa pa kinda lâ ŋgua nia. Andeta Maro Kindeni ikai ŋgua tukuŋa ŋinde ne walo ndoni piti lâ, aku isona itâra lâ Kirisi ne kêi popole tini.

¹⁵ Kirisi ne mateŋa lâ kêi popole tini izavaru koroani kaika nenzi walo ndo lâ, kinzi koroani ŋinde uru sikai poe pa kelekele kie-kie. Kirisi ne mateŋa ŋinde itula pwataki panzi tamâta rârâni tu i ipolenzi koroani ŋinde rârâni marumbu lâ, aku ivetanzi sipânga togo kelekele kaa nâ lâ tamâta rârâni naonzi.

Ŋgua tukuŋa ne vetâŋa kie-kie ikura tu ivila kinda, nde tia

16 Mine nde miki ma ilomi ñalae koña ñana tamâta nenzi ñgua tukuña kiri-kiri ñana kâña-nuña wa kumbwa kie-kie wa nzimona wasaseki wa pwareâña ne zo sapâña wa, mine ndimo.

17 Ñgua tukuña ne vetâña ñinde rârâni nde itogo uña kaa nâ, aña vetâña mao nde ipânga muli. Kirisi nde vetâña mao warika.

18 Tamâta pinde uru sitapâri ñalae koña ñana mâsi pinde simora lâ nenzi mbupuleña. Kinzi tamâta mine sipono muli pa tamâta nâ nenzi ilo-kalo kaa nâ, kala sipasuka warakanzi tininzi koa tia nâ. Kinzi sindeka ñana silâñe tu kinzi sipatawa warakanzi tininzi, aku sindeka ñana sipaneanzi añelo tona. Miki ma kapalono pa nenzi ñgua lañeña ñinde ndimo. Tia ma muli Maro Kindeni ma tini pwâka tu kulu ara tonje ilami.

19 Tamâta ñinde nde sipatâpa warakanzi piti ndo ñana Kirisi kâ, ina kala imo kulu-kâmba pa kinda kalo-tawana tamâta ñgu. I uru ikai poe pa ne ñgu kinda, aku i simbo nâ uru ivila nenda kalo-tawana ñana itumbu ñalañala, ikura Maro Kindeni ipatea pa kinda mine.

20 Miki kapaipa kuku Kirisi lâ, aku ñinde itogo miki kamâte kuku i. Mine kala tâno ñine ne ñgua kaa kaa ikura tu ikai poe pami kilo, ande tia. Mine nde ñana sâ kâ ñga miki kamo katogonzi tâno ñine ne tamâta, a? Ñana sâ kâ ñga miki kapono muli pa tâno tamâta nenzi ñgua tukuña kiri-kiri, a?

21 Kinzi nenzi ñgua tukuña ñinde nde kie mine: “Noko ma kusaña ñinde ndimo”; “Noko

ma kuka ñinde ndimo”; “Noko ma kutanjo ñinde ndimo”.

²² Taitu tukuña kie mine nde ñana kelekele kaa nâ kinda takai, ñinenğa marumbu walele nâ. Kinzi tamâta nâ situla ñgua tukuña mine ku sipanana kinda tu taponu muli papa.

²³ Mao nâ, tamâta pinde ilonzi pateu tu tukuña mine irerege kuku ilo-kalo ara, ñana tu tukuña ñinde itula vetâña ñana tapaneanzi anjelo wa tapatawa warakânda tininda wa taveta nâna pa warakânda karaenda wa. Andeta vetâña kie mine ikura tu ivila kinda ñana tapu mulinda pa ilo-kalo siŋga ne vetâña potomule kâ, ande tia.

3

Kinda takai via wasaseki kuku Kirisi

¹ Muŋga, lâ zo ñinde Maro Kindeni ipaño Kirisi lâ materña nianzi imo via kilo, ande miki kala kakai via wasaseki tona. Mine nde ara ñana miki ma ilomi pa samba ne kelekele nâ. Lâ samba lawea, ande Kirisi isaño na imo pa Maro Kindeni tini pa wia kâ.

² Ara ñana miki ma kalomi ñgere ñana samba ne kelekele nâ ikura zo zo. Miki ma kalomi ñgere ñana tâno ne kelekele ndimo.

³ Ñana tu itogo miki nemi ilo-kalo siŋga nde imâte lâ, aku miki kapasipa lâ taitu kuku Maro Kindeni lâ. Mine kala Maro Kindeni ikatona nemi via mao pami lâ nia ñinde Kirisi imo.

⁴ Kirisi nde nemi via mao ñinde warika. Aku lâ zo ñana i ma itaulo imâ ipânğa nia yo, ande miki ma kamo kuku i, aku tamâta rârâni ma simora i kilala pwataki tu i imo Maro Njalae.

Kinda tapânga tamâta wasaseki lâ

⁵ Mine nde ara ñana miki ma kapu mulimi ndo pa tâno ñine ne ilo-kalo rârâni. Ilo-kalo ñinde uru igagatimi ñana kapalulua tinimi potomule wa, kapaveta kuku vetâña muso kie-kie wa, ilomi yosi pa tinimi pinde nenzi kelekele wa. Lâ Maro Kindeni nao, ande mâsi ñana ilomi yosi pa tinimi pinde nenzi kelekele kê ande irerege kuku mâsi sakamao ñana kawâñgi kapaneanzi maro lañeña kê.

⁶ Ñana vetâña kie mine kê, ande Maro Kindeni ne wisi-nâna ma imâ panzi tamâta ñinde uru tañanzi kaika pa i ne ñgua.

⁷ Aku muñga miki warakami kala kapono muli pa ilo-kalo potomule ñinde mine nâ, kala kapaveta kuku vetâña ñinde rârâni.

⁸ Anğa lâ zo ñine, ande miki ma kapile vetâña potomule kie-kie mine; mâsi ñana wisi-nâna kê, anğa mâsi ñana pawañja kê, anğa mâsi ñana ilomi kêki ñana kaveta malia panzi tinimi pinde kê, anğa mâsi ñana kaporo ñgua soki ñananzi tinimi pinde kê, anğa mâsi ñana kaporo ñgua sakamao-sakamao kê.

⁹⁻¹⁰ Miki muñga kasoki ilo-kalo siñga tava ne mâsi rârâni piti lâ, aku kapâñga tamâta wasaseki marumbu lâ. Mine kala miki ma kaporo ñgua lañeña panzi nimi-nambwe kalotawana tamâta ndimo. Maro Kindeni ipuliami kapâñga tamâta wasaseki lâ, aku i ilo tu miki ma kasama i kilala sondo ndo. Mine kala ikura zo rârâni i uru iveta wurâta lâ ilomi kalomi, ñana miki ma kapâñga kamo togo i tamwata imo mine.

¹¹ Kinda tapânnga tamâta wasaseki lâ. Mine nde kinda rârâni tamo rege-rege nâ. Kinzi tamâta lâ tinikoa ngu nde rege-rege kunzi tamâta lâ Juda ngu. Annga tamâta ninde munnga sikai karae-veña ne mâsi lâ tininzi nde rege-rege kunzi tamâta ninde nandai sikai mâsi ninde lâ tininzi. Annga tamâta ninde simo lâ tâno malawae, nenzi ngua wa vetâña piti-piti, sitavanzi tamâta uru siveta wurâta koa tia nâ panzi tamâta pinde wa tamâta uru sikai mbumbu lâ nenzi wurâta tini wa, ande kinzi ninde rârâni nde rege-rege nâ, nana tu Kirisi simbo nâ nde njae, aku i tamwata imo ne tamâta kinda rârâni taitu-taitu ilonda.

Kinda ma tao ilonda ndo ilâ panzi tininda pinde

¹² Maro Kindeni ipatea miki tu ma kamo i tamwata ne ngu, aku i ilo ndo keno pami. Mine nde ara nana miki ma kapaveta kuku vetâña arara mine: miki ma kalomi sukâña panzi tinimi pinde; miki ma kaveta kemi ara nâ panzi; miki ma kapatawa warakami tinimi; miki ma kamo mwasa nâ kunzi tinimi pinde; aku miki ma wisimi nâna walele panzi ndimo.

¹³ Ambo noko ninambwe kalo-tawana tamâta tonge ma italea noko nana vetâña tonge munnga kuveta, ande noko ma wisi nâna papa i ndimo. Ara nana miki taitu-taitu ma kazavaru nimi-nambwe nenzi vetâña soki rârâni piti lâ. Maro Njae izavaru miki rârâni nemi kiesaka piti lâ; mine nde miki kala ma kazavaru tinimi pinde nenzi vetâña soki piti lâ tininzi mine nâ.

¹⁴ Aku ara ñana miki ma kasenge vetâña taitu ñine ilâ kunzi vetâña arara ñinde; miki ma ilomi ndo panzi tinimi pinde. Vetâña ñine nde ipolenzi vetâña arara rârâni, aku iveta miki kamo ilomi kalomi taitu, ikura Maro Kindeni ne pateâña mine.

¹⁵ Maro Kindeni ipatea tu miki ma kamo see ñgu taitu, aku i ilo tu Kirisi ne wisi-pisi ma imo ñginimi. Mine kala ara ñana miki ma kasâu pa i ne wisi-pisi ñinde tu ikai poe pami. Aku ara ñana miki ma kawami ndange papa i tona.

¹⁶ Lâ zo ndia miki ma kakai ilo-kalo ara ku kapanananzi nimi-nambwe kalo-tawana tamâta wa katunzi sondo wa, ande lâ zoni ndaina miki ma kapasakana Kirisi ne ñgua ara rârâni ikeno kaika lâ ilomi kalomi. Aku lâ zo ndia miki kawâñgi wâñgiña paneâña kâ wa ndekâña ne wâñgiña wa wâñgiña pinde Koroani Sapâña itula ipâñga lâ ilomi kalomi wa, ande ara ñana miki ma kapasakana Kirisi ne ñgua ñinde kaika ku kawâñgi tava kawami ndange pa Maro Kindeni.

¹⁷ Aku nemi ñgua poroña ndia wa vetâña ndia miki kaveta wa, ande miki ma kaveta ñinde rârâni lâ Maro Ñalae Yesu ña. Aku Yesu ma isukami ñana kawami ndange pa Tamânda Maro Kindeni.

Paulo iporo ñgua panzi tamâta simo see taitu

¹⁸ Miki taine ma kaveta ikura kaiwami tamâne kawanzi ñgua mine. Mâsi ñinde nde sondo ndo lâ Maro Ñalae nao.

19 Anḡa miki tamâne ma tinimi mwasa nâ panzi kaiwami taine. Miki ma kambitanzi ku kaleleanzi ḡalae koḡa ndimo.

20 Anḡa miki lâlu, miki ma kaponu muli pa tinami-tamami nenzi ḡgua ikura zo rârâni. Maro ḡalae ilo ara ndo ḡana vetâḡa mine.

21 Anḡa miki lâlu ḡinde tamanzi, miki ma kaveta natumi ḡinde wisinzi nâna ndimo. Ambo miki ma kaveta mine panzi, ande kinzi ma simo tava ilonzi malia nâ.

Paulo iporo ḡgua panzi tamâta uru siveta wurâta koa tia nâ, sitavanzi tamâta ḡinde nenzi tamâta ḡalaḡala

22 Miki tamâta ea uru kaveta wurâta koa tia nâ panzi tamâta ḡalaḡala, miki ma kaponu muli pa nenzi ḡgua rârâni. Miki ma kaveta mine lâ zo ndia kinzi simo laiti silea pami, aku lâ zo ndia simo malawae tona. Miki ilomi tu kinzi ma sindeka ḡana nemi wurâta kâ, aku ḡinde nde ara. Andeta miki kamege ḡana Maro ḡalae, aku ḡana duvi ḡinde kâ miki ma kalomi ḡgere sondu ku kaveta nemi wurâta rârâni ara nâ.

23 Wurâta ndia miki kaveta, ande miki ma kamandi kaika ku kaveta wurâta ḡinde sondu ndo. Ara ḡana miki ma ilomi mine; “Naḡa aveta wurâta ḡine panzi tamâta nâ, ande tia. Naḡa aveta wurâta ḡine papa Maro ḡalae tona.”

24 Miki kalomi ḡgere sondu ḡana ḡine kâ; Maro ḡalae nde ipatea vetâḡa arara pinde ḡana iveta panzi ne tamâta, aku muli i ma iveta vetâḡani ndaina pami, itogo nemi wurâta ne kulu mine. Kirisi ina nemi koipu mao, aku

wurâta ndia miki kaveta, ande miki kaveta papa i.

²⁵ Nana tu tamâta ea kinzi siveta vetâŋa potomule, ande kinzi ma muli sikai pareŋa-nia nana nenzi vetâŋa soki ninde kâ. Maro Kindeni iveta vetâŋa kie taituni panzi tamâta rârâni.

4

¹ Anŋa miki tamâta ŋalaŋala, miki ninde kala kamo koipu panzi wurâta tamâta pinde, ande miki ma kaveta kemi ara ku sondo nâ panzi. Miki kalomi ŋgere sondo nana nîne kâ; miki warakami nemi koipu kala imo samba lawea.

Kinda ma tapakatona warakânda nenda vetâŋa ku takai noŋa sondo

² Miki ma kakai wulitia nana kano pa Maro Kindeni kâ ndimo. Aku lâ zo ndia miki kakai noŋa, ande miki ma kalomi ŋgere sondo ku kawami ndanŋe papa i.

³ Aku ara nana miki ma kakai noŋa pa Maro Kindeni tu ma ivila maka tona, ku ma ikai nzâla piti pama nana katula i kawa ŋgua nana Kirisi kâ. Ngua ninde muŋga ikeno paveâŋa nâ, kala nîne ipâŋga nia yo. Kinzi sipa wâlo kaika lâ tiniŋgu ku sio naŋa amo luma sakamao ilo nana nanenŋu wurâta ninde kâ.

⁴ Aku ara nana miki ma kano pa Maro Kindeni tu ma ivila naŋa nana atula ŋgua ninde sondo ipâŋga nia yo, ikura i ne pateâŋa mine.

⁵ Tamâta pinde nandai kalonzi tawana Yesu Kirisi ŋga. Lâ zo ndia miki kamo kunzi tamâta mine, ande miki ma kapakatona sondo nana nemi vetâŋa kâ. Ambo miki ma kaluku nana

katula pâri ara panzi tamâta ñinde ikura zo rârâni, ande ñinde ma ara.

⁶ Aku lâ zo ndia miki kaporo ñgua panzi, ande miki ma kaporo ñgua ara nâ. Ambo miki ma kaveta mine, ande kinzi ma ilonzi ara ñana siloño nemi ñgua kâ. Ambo tamâta tonge ma ikasonami ñana ñgua pinde, ande miki ma kaporo ñgua sondo nâ taulo papa.

Paulo isupwanzi Tikikus ku Onesimus rua silâ pa Kolosi lawea

⁷ Tikikus ma imâ itapâri pami ñana vetâña rârâni ipânga pa naña lâ. Tikikus nde ninda-nambwe, aku maka iloma ara nâ papa i. I uru iveta wurâta pa Maro Njalae, itogo maka mine, aku ne wurâta ñinde nde ipânga ara ndo.

⁸ Mine kala naña asupwa i imâ pami, ñana miki ma kasama ñana maka nema sañonâña wa moña wa. Naña ilongu tu i ne ñgua ñinde ma ipu tini kaika pa ilomi kalomi.

⁹ Aku naña asupwa nawalami Onesimus kala imâ kuku Tikikus. Onesimus nde ninda-nambwe, aku i uru iveta ne wurâta rârâni sondo nâ. Kinzi rua ma sitapâri pami ñana vetâña rârâni kala ñine ipânga lâ nia ñine.

Paulo iporo wisi ara ne ñgua ilâ panzi Kolosi ñgu

¹⁰ Aristarkus imo kuku naña lâ luma sakamao ilo, aku i kawa kari ara pami. Anğa Malaka, ina Banabas tai, ande i kala mine nâ kawa kari ara pami. Ambo Malaka ma imâ pami, ande ara ñana miki ma kandeka nâ ku kakai imâ

imo kumi, ikura ngua njinde munnga sipananami mine.

¹¹ Annga Jisas, i na tonje Jastus, ande i kala kawa kari ara pami. Lâ Juda ngu, ande tamâta nato njinde simbonzi nâ uru siveta wurâta kuku naña nana kakainzi tamâta simâ Maro Kindeni ne ngumbi ilo. Aku kinzi uru sivila naña sondo nâ.

¹² Annga Epafras kala kawa kari ara pami tona. I nde miki nawalami tonje, aku imo Yesu Kirisi ne wurâta tamâta. Ikura zo rârâni, ande i uru ikai noña kaika pa Maro Kindeni tu i ma isukami, nana miki ma kamandi kaika ku kaponu muli sondo pa vetâña rârâni Maro Kindeni ipatea pami njinde, itogo kalo-tawana tamâta mao uru siveta mine.

¹³ Nana warakângu asama kala aporo pwataki tu Epafras uru imakâsa nalae tina nana ivila miki tavanzi kalo-tawana tamâta simo Laodisia lawea wa Hierapolis lawea wa.

¹⁴ Annga Luka, ina tamâta nana ivetanzi pukonja kâ njinde maka tinima mwasa ndo papa, ande kinzi rua Demas rua kala kawanzi kari ara pami.

¹⁵ Nana ilongu tu miki ma kaporo kawama kari ara panzi ninda-nambwe kalo-tawana tamâta simo Laodisia lawea, aku imâ pa Nimfa tavanzi kalo-tawana tamâta uru sipasau lâ i ne luma njinde tona.

¹⁶ Nana ilongu tu miki ma kaponu pepa njine marumbu lâ nga, njinenga kao ilâ panzi kalo-tawana tamâta ngu simo Laodisia lawea, nana kinzi kala ma sipono tona. Aku pepa njinde naña munnga ao ilâ panzi kalo-tawana tamâta simo

Laodisia lawea, ande naŋa ilonŋu tu kinzi ma sio pepa ŋinde imâ pami ŋana miki ma kapono tona.

¹⁷ Aku miki ma kaporo ŋgua mine pa Arkipus; “Noko ma kupakatona sonde, aku wurâta ŋinde munŋa silano ŋana kuveta pa Maro Ŋalae kê, ande noko ma kuveta wurâta ŋinde sonde lee ikura wurâta ŋinde ma marumbu ndo lâ.”

¹⁸ Naŋa Paulo, naŋa warakâŋgu mbaunŋu aŋgere kari ara ne ŋgua ŋine imâ pami. Naŋa ilonŋu tu miki ma kalomi ŋgere ŋana naŋa kê, ŋana tu naŋa amo luma sakamao ilo amo ŋai yo. Maro Kindeni ne wisi-wisi imo kumi.

MARO KINDENI KAWA NGUA
The New Testament and Psalms in the Sio Language
of Papua New Guinea
Nupela Testamen long tokples Sio long Niugini

Copyright © 1995 Wycliffe Bible Translators

Language: Sio

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-09

PDF generated using Haiola and XeLaTeX on 28 Dec 2024 from source files dated 31 Aug 2023

b3b81168-89df-5bc3-8b0c-cf72ef93d3de